

Giraval.

Maitin d'estiu, de solelh e de montanha,
Le Giraval es ailà ensús que reganha.
I camini... jamès benlèu i arribarai.
Coma tu, que jamès benlèu abraçarai.

La lutz creis e jols ròcs las ombras s'amagan,
Las èrbas s'eissugan, las vidas s'alargan.
Ieu avanci, le vam del bèl temps me pòrta,
Somi de tu, que vietase me confòrta !

Las jaças verdas, las pèirassas austèras,
Les estanhòls clarinèls, las cimas autièras,
Unics païsatges dignes de magèstat,
Son pas qu'infimes rebats, de ta beutat.

Del rèc que davala pels ròcs malengalhats,
L'aiga giscla de mila resquits encigalhats.
Ausissi de longa son plasent gargolh,
E de tos risolets, le benfasent mormolh.

Dels abardals, de la tòra, del sanicon,
De la regalécia, las flors a l'unisson,
Dançan pel carreiròt, misterioses balets.
Ieu i vesi tos uèlhs, gracioses farfadets.

Puji, puji, traquet, traquet, tot solet,
M'apugui sus un bròc, planvengut pecolet.
Qu'aimariái que Dieu, se n'i a un, m'exaucèsse,
Ta man dins ma man, que tu m'acompanhèsses...